



Broj: UP-I-KSI-09-19/22  
Datum: 06.04.2023. godine

Na osnovu člana 25. Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj: 04/21), Komisija za odlučivanje o sukobu interesa, postupajući po službenoj dužnosti, u predmetu utvrđivanja povrede odredaba navedenog Zakona od strane R.S. iz Brčkog, šefa Odjeljenja za javne poslove Vlade Brčko distrikta Bosne i Hercegovine, nosioca javne funkcije, na 51. sjednici održanoj dana 05.04.2023. godine, donijela je

### **RJEŠENJE**

1. **UTVRĐUJE SE** da je R.S. iz Brčkog, šef Odjeljenja za javne poslove Vlade Brčko distrikta Bosne i Hercegovine, kao nosilac javne funkcije postupio protivno članu 19. stav (1) i stav (2) i članu 20. Zakona o sprečavanju sukoba interesa u institucijama Brčko distrikta Bosne i Hercegovine na način da dana 23.12.2021. godine u podnesenom Izvještaju o imovinskom stanju na obrascu o imovinskom stanju nosioca javne funkcije, bračnog i vanbračnog druga, djece i drugih članova porodičnog domaćinstva kao i lica prema kojima nosilac javne funkcije ima zakonsku obavezu izdržavanja-Aneks II Komisiji za odlučivanje o sukobu interesa, nije prijavio nepokretnu imovinu bračnog druga.
2. Za učinjeno kršenje odredaba Zakona o sprečavanju sukoba interesa u institucijama Brčko distrikta Bosne i Hercegovine, R.S. se shodno članu 43. navedenog Zakona izriče opomena.

### **Obrazloženje**

Komisija za odlučivanje o sukobu interesa je po službenoj dužnosti zaključkom, broj: UP-I-KSI-09-19/22 od 09.12.2022. godine, pokrenula postupak za odlučivanje o povredi odredaba Zakona o sprečavanju sukoba interesa u institucijama Brčko distrikta Bosne i Hercegovine protiv nosioca javne funkcije R.S. iz Brčkog, šefa Odjeljenja za javne poslove Vlade Brčko distrikta Bosne i Hercegovine, jer je posumnjala u tačnost i potpunost podataka u podnesenom Izvještaju o imovinskom stanju na obrascu o imovinskom stanju nosioca javne funkcije, bračnog i vanbračnog druga, djece i drugih članova porodičnog domaćinstva kao i lica prema kojima nosilac javne funkcije ima zakonsku obavezu izdržavanja-Aneks II, zbog neusklađenosti između prijavljene imovine u Izvještaju o imovinskom stanju, podnesenom dana 23.12.2021. godine od strane nosioca javne funkcije Komisiji za odlučivanje o sukobu interesa i podataka prikupljenih od nadležnih organa i institucija o nekretninama bračnog druga nosioca javne funkcije, jer nosilac javne funkcije nije prijavio, odnosno u Izvještaj o imovinskom stanju

nije tačno i potpuno unio podatke o nepokretnoj imovini bračnog druga, tačnije nekretninu označenu kao parcela, broj: [REDAKTIRANO], „[REDAKTIRANO]“ dvosoban stan [REDAKTIRANO], [REDAKTIRANO] sprat, u površini od 63m<sup>2</sup> upisanu u zk. uložak broj: [REDAKTIRANO] E, poduložak, broj: [REDAKTIRANO], etažni uložak, broj: [REDAKTIRANO] E za k.o. Brčko 1, vlasništvo T.S., bračni drug nosioca javne funkcije sa dijelom od 1/1.

Nosilac javne funkcije je istim zaključkom pozvan da Komisiji za odlučivanje o sukobu interesa dostavi izjašnjenje u roku od 15 dana od dana dostavljanja zaključka.

Nakon prijema zaključka o pokretanju postupka, broj: UP-I-KSI-09-19/22 od 09.12.2022. godine, zaprimljen 12.01.2023. godine, R.S., šef Odjeljenja za javne poslove Vlade Brčko distrikta Bosne i Hercegovine, kao nosilac javne funkcije je dana 16.01.2023. godine dostavio Komisiji za odlučivanje o sukobu interesa pisano Izjašnjenje u kojem, između ostalog, navodi da je prilikom popunjavanja obrasca Izvještaja o imovinskom stanju, podnesenom Komisiji dana 23.12.2021. godine, nenamjerno učinio grešku i tako propustio unijeti podatke o vlasništvu supruge T.S. nad stanom u ulici [REDAKTIRANO] u Brčkom, površine 63m<sup>2</sup>, sa vlasništvom 1/1. Dalje navodi da je njegova supruga vlasništvo nad predmetnim stanom stekla 2005. godine, mnogo prije nego je on postao nosilac javne funkcije, te s tim u vezi nije postojala nikakva namjera da se pogrešno prikaže imovno stanje, dok su prethodni izvještaji o imovinskom stanju sadržavali i podatke o predmetnom stanu, iz čega proizilazi da je učinjena nenamjerna greška.

R.S. obnaša funkciju šefa Odjeljenja za javne poslove Vlade Brčko distrikta Bosne i Hercegovine na osnovu Odluke Gradonačelnika Brčko distrikta Bosne i Hercegovine, broj: 33-005509/20 (01.1-1413EK-002/20) od 31.12.2020. godine, te je shodno članu 2. Zakona o sprečavanju sukoba interesa u institucijama Brčko distrikta Bosne i Hercegovine nosilac javne funkcije i upisan je u Registar javnih funkcija i nosilaca javnih funkcija.

Članom 19. stav (1) Zakona o sprečavanju sukoba interesa u institucijama Brčko distrikta Bosne i Hercegovine propisano je da je nosilac javne funkcije dužan u roku od 30 (trideset) dana od dana stupanja na javnu funkciju, podnijeti Komisiji Izvještaj, za sebe i bračnog i vanbračnog druga, djecu, druge članove porodičnog domaćinstva kao i lica prema kojima nosilac javne funkcije ima zakonsku obavezu izdržavanja, prema stanju na dan kada je izabran, odnosno imenovan, dok je stavom (2) istog člana, između ostalog propisano i da Izvještaj sadrži lične podatke nosioca javne funkcije i članova njegove uže porodice, uključujući JMB, podatke o funkciji koju nosilac javne funkcije obavlja, dok je tačkom b) istog člana propisano i da sadrži podatke o imovini, uključujući novac, račune u banci, poslovnu dokumentaciju, dionice, vrijednosne papire, obveznice, nepokretnu imovinu, stanarsko pravo i drugu imovinu i dobra u vrijednosti većoj od 5.000,00 KM u Bosni i Hercegovini i inostranstvu.

Primjenom navedenih zakonskih odredaba na utvrđeno činjenično stanje, ocijenjeno je u konkretnom slučaju da postoji povreda odredaba Zakona o sprečavanju sukoba interesa u institucijama Brčko distrikta Bosne i Hercegovine, s obzirom na to da R.S. nije u Izvještaju o imovinskom stanju podnesenom 23.12.2021. godine Komisiji za odlučivanje o sukobu interesa unio podatke o vlasništvu supruge, odnosno bračnog druga nosioca javne funkcije nad gore navedenim stanom, čime je postupio protivno odredbi člana 19. stavovi (1) i (2) te članu 20. Zakona o sprečavanju sukoba interesa u institucijama Brčko distrikta Bosne i Hercegovine.

Uvidom u Izvod iz matične knjige vjenčanih izdat od Gradske uprave grada Bijeljina-Odjeljenje za opštu upravu, broj: [REDAKTIRANO] od [REDAKTIRANO] godine, utvrđeno je da je R.S. zaključio brak sa T.R. dana 01.05.2011. godine u Bijeljini, te je zbog toga obaveza nosioca javne funkcije unijeti podatke o imovini svog bračnog druga u Izvještaj o imovinskom stanju

Član 38. Zakona o sprečavanju sukoba interesa u institucijama Brčko distrikta Bosne i Hercegovine propisuje sankcije za nosioca javne funkcije koji postupi suprotno odredbama navedenog Zakona.

Komisija je, shodno članu 43. Zakona o sprečavanju sukoba interesa u institucijama Brčko distrikta Bosne i Hercegovine, prilikom odlučivanja o vrsti sankcije koju treba izreći u konkretnom slučaju, a pri tome vodeći računa o težini i posljedicama povrede Zakona, te činjenici da je R.S., nosilac javne funkcije, predao Izvještaj o imovinskom stanju za 2022. godinu u kojem je upisao podatke o predmetnom stanju, te se prema njegovom postupanju i odgovornosti, ličnosti nosioca javne funkcije, odnosu imenovanog prema kršenju odredaba navedenog Zakona kao i opredijeljenosti imenovanog da postupi u skladu sa Zakonom, te otkloni razloge koji su doveli do kršenja odredaba Zakona kao i prouzrokovanoj posljedici, radi o očito lakšem obliku kršenja odredaba Zakona, koje nisu nanijele štetu integritetu javne funkcije koju R.S. obavlja, Komisija je stava da izrečena opomena u potpunosti odgovara težini i posljedicama povrede Zakona.

Komisija je, cijeneći sve dokaze pojedinačno i u međusobnoj vezi, shodno članovima 4., 25. i 43. Zakona, donijela rješenje kao u dispozitivu.

Odluka Komisije bit će objavljena na službenoj Internet stranici Komisije.

**POUKA O PRAVNOM LIJEKU:**

Shodno članu 37. stav (1) Zakona, ovo rješenje je konačno u upravnom postupku i protiv istog nije dopuštena žalba, ali se može pokrenuti upravni spor u roku od 30 dana od dana dostavljanja rješenja, tužbom pred Osnovnim sudom Brčko distrikta Bosne i Hercegovine.

Predsjednik  
Komisije za odlučivanje o sukobu interesa

---

Admira Mujić, dipl. pravnik

Dostavljeno:

1. R.S., Brčko distrikt BiH,
2. Internet stranici Komisije,
3. Evidenciji i
4. Arhivi.